

# A OYEB BIT YET CUSC'ULAL

---

## Bit yet cusc'ulal yuj yailal Jerusalén

- 1** <sup>1</sup> Cusiltakxac'al max yuncan conob Jerusalén bay xiwil anima yet payxa. Lajanxac'al max yuncan jun miman conob ti', axca chi yuncan junok ix ix tol mayal camtok yichamil.
- <sup>2</sup> A yet payxa, axca tol yajaw yayji xol nacionlak, axa tinani', chi ak'lay pural yoc yin mulnajil. Toxc'a chi t'ukbi c'ul yok' yet ak'balil; tol wal jilili yaytek yal sat yin tz'eyil-lak sat. A xol juntzan nación watx' yak'on yetok, c'amxa junok chi mimanc'ulneni. Masanilxac'al max meltzoy oc ajc'ulal yin.
- <sup>3</sup> Caw wal ya' chi yab eb aj Judá yuj mulnajil tol yatak yoqui; ilab mayal ilaytok eb yin presoal. Ayxa ec' eb xol juntzanxa nación. C'am jabok xewilal chi yun eb. Ayxa ec' eb xol yatakilal; max michchaj eb yuj eb chi ukteni.
- <sup>4</sup> Cusiltakxac'al yayji beal Sión tinani'. Tok ayto mactxel chi jayoc yet k'in. Tz'ininixac'al yayjican puertail conob. Asanxanej ok'il chi yun eb sacerdote. Eb k'opoj tacnakxac'al c'ul eb. A conob Jerusalén lanan yeq'uel yailal yiban.
- <sup>5</sup> Mayal ayc'ay yuj eb yajc'ul; a eb ajc'ul oc yin tu', lanan yaj can eb. A Jehová max aon oc yailal yiban, yujtol yelxac'al miman is yobtakil max yaocok. Mayal ilaytok eb cajan bay tu' yin presoal yuj eb ajc'ul.
- <sup>6</sup> Mayal c'ayaj is watx'ilal yili conob Sión. A eb is yajawil eb, lajanxac'al eb axca no' tx'ucchej c'amxa chi ilchaj is lobej, xan lanan pax yip. Toxac'al jutxbil yakan satak eb chi ukteni.
- <sup>7</sup> A wal yet c'ual ayoc eb aj Jerusalén yaben yail yin etnejc'ulal, chi naontek eb masanil beyomal ay bay eb yet yalantok. A yet max ayc'ay eb yul k'ab eb ajc'ul, c'amxa mactxel max colon el eb. A wal yet chi il-lay oc eb yuj eb ajc'ul tu', chi buchlay eb yuj mayal ayc'ay eb.
- <sup>8</sup> A eb aj Jerusalén, yelxac'al miman yobtakil eb max yaocok, xan moj wal yajlayi. A eb tol miman yelapnok jun conob tu' yul sat

yet payxa, axa tinani', tolxa chi yaj eb, yujtol mayal il-lay is q'uixwiltakilal. Yuj tu' xan a eb aj Jerusalén, caw wal chi ok' eb, toxac'al chi makchej el eb sat yuj q'uixwilal.

- 9 Caw wal miman txequel yayji is yobtakil eb cajiyo bay Jerusalén tu', palta tokwal ay tzet chi na eb yuj tzet ok jayoc yiban. Caw wal c'ayubtaxac'al max yun yayc'ay is conob eb, tok ay mactxel chi mimanc'ulnen eb. Chi yal eb anima bay tu': Mamin Jehová, ilawal co yailal on, yujtol a eb jajc'ul on, mayal on yuch lajwok eb, xi eb.
- 10 A eb ajc'ul mayal yican eb masanil is beyomal Jerusalén. Max yil wal jun conob tu' yoctok lemnaj eb tx'ok conobal bay yul is templo Dios, a ton juntzan anima tol max yal Cham, tol c'am chi je' yoctok.
- 11 A masanil eb cajiyo chi ok' eb, chi ec' eb sayon is lobej. Mayal yatok eb is beyomal q'uexelok is lobej, mimanokxac'al iquis ec' eb. Max yalon eb: ¡Mamin Jehová, ocan t'anan jin yin tzet max yun jayc'ayi! ¡Mamin Jehová, il wal oc a c'ulok jin yuj co yailal!
- 12 A ayex lanan e toj yulak be ti', ocanek waanok che naoni, ¿ay mi wal yailal axca jet ti'? Yelxac'al chi ec' yiban jaben yail. A Jehová max yatek jun yailal ti' jiban yuj yowal is c'ul.
- 13 Atac'al bay satcan max yatek Jehová jun k'ak'ej, yet chi yak' lajwok ay co bakil. Max watx'nej ay jun yal co satak, cay wal tu' max yun co meltzojtok jintak. Max on beklaycan yuj, junjunxac'al bek chi yaon oc yailal jiban.
- 14 Mayal yil Jehová co yobtakilal, ac'al oc co yobtakil tu' max on c'alon ayok, axca wal junok ikatz caw wal al yayji oc jiban, caw wal tol chi pax jip yuj. Mayal con yaoc Cham Jajawil yul k'ab eb ajc'ul; satak eb tu' c'amxa chi je' co tec'ban co ba.
- 15 Caw wal najat max yican el Jehová eb caw wal tec'an yin colwaj jetok. Max yatek jun miman bulan soldado yin yak'on owal jin, yet chi lajwi ay masanil eb jach'ej on. Mayal on tec'lay ay ayon aj Judá on ti' yuj Cham, axca wal chi yun tec'lay el yal an uva.
- 16 Yuj wal juntzan ti' xan chon ok'i; caw wal chi el yal co sat. Tok ayto mactxel chon mimanc'ulneni; tok ayto mac chi je' yak'on co tec'anil. A xol yailal tu' max can eb juninal on, yujtol a eb ajc'ul tu' yelxac'al max je' yuj eb jintak.
- 17 Max jiaj co k'ab yin tewilal, palta c'am mactxel chon mimanc'ulneni. A Jehová max wajbantek eb cajan co cawilal yet chi yak'on eb owal jin. A Jerusalén ti', intaknebilxac'al yayji yuj eb.
- 18 Max yun wal Jehová axca wal is mojalil, yujtol tenomtak max jut co ba bay is chekbanil. Ex conob, abek wal tzet ok jala'; ilek wal co yailal. A eb juninal on, mayal ilaytok eb yin presoal.
- 19 Max co k'an colwal juntzan nacionlak ayoc jetok yaloni, palta toc'al chon yetnej eb. A eb cham sacerdote, c'al eb cham icham winak, lanan yec' eb sayon is lobej, max cam eb yuj wajil yulak calleal conob ti'.

- 20 Ilab wal xin Mamin Jehová, a wal yuj co yailal ti', xan caw wal ok nie'chaj txam co c'ul chi jabej. A wal yailal tu' chi oc pitz'itz'ok yin co c'ul chi jabej, yet chi co naontek co tenomtakil max el juneni. A bay yina tu' chi ak'l'lay cam eb juninal on yetok espada, axa bay yul conob ti', ay c'apax camich.
- 21 A eb anima, chi yab wal eb yel jaw yuj co cusc'ulal, palta tok ay mactxel chon mimanc'ulneni. A masanil eb ajc'ul oc jin, yojtakxac'al eb co yailal, caw wal chi tzalaj eb yuj co yailal max aoc jiban. Jayokab oc jun c'u tol albilcan el oj yet payxa, yet watx' lajan ok yun eb axca chi jun ti'.
- 22 Natek jantak is yobtakil eb. Ut c'apax eb yuj is yobtakil, axca wal chon ot yuj jet ti'. Caw wal mimanxa chon ok'i, chi pax yip janimail chi jabej, xi eb aj Jerusalén bay Jehová.

### Yailal ayoc yiban Jerusalén yuj Jehová

- 2** 1 Caw wal miman max yun yowal c'ul Cham Yajaw, toxac'al max k'ekk'olcan el bay conob Sión tol watx' yili, max yuch lajwok watx'ilal yili Israel, tol c'amxa axca. Tokwal maxto natek Cham batxclub yakan tu' yuj yowal is c'ul.
- 2 C'amxa junok conob bay cajan eb yinatil Jacob maxto cancan yuj Cham. A yuj yowal c'ul, xan yin wal jun bek max yak' lajwok ay is cuartel-lak eb aj Judá. Mayal ayc'ay jun nación ti' sat tx'otx' yuj, yetokc'al masanil eb yajaw yayji bay tu'.
- 3 Yuj yowal c'ul tu', xan max yak' lajwok masanil is yipalil Israel. Max yiel Cham is colwal yin, yet max jayoc eb ajc'ul. Max yaoc Cham is k'ak'alculal yiban yinatil Jacob, axca wal junok k'ak'ej chi ak'on lajwok masanil tzet yetal.
- 4 A Jehová, lajan wal max yut ba axca junok ajc'ul, max yijbajtok is julbal yin; lajan wal axca junok c'aywajwom, max mak'on cam eb ochebil juj; axca wal junok k'ak'ej, caywal tu' yayji oc yowal c'ul yiban cajlobal eb aj Sión.
- 5 Lajan wal max yun Jehová axca wal chi yun junok ajc'ul. Max lajwi ay Israel yin junelnej yuj. Max yuchay masanil cuartel c'al despacho Judá; txololixac'al jayoc yailal yiban eb aj Judá tu' yuj.
- 6 Axca wal chi yun yetnelaytok junok awoj, caywal tu' max yun yetnentok Cham is templo bay chi oc wajayil. A' max ak'on tojcan c'ayc'ulal k'in c'al c'ual xewilal yuj conob Sión. A yuj yowal c'ul Cham, xan max yintaknejcan el Cham eb rey c'al eb sacerdote.
- 7 Mayal yintaknej can el Jehová is yaltar, cax c'amxa yopiso is templo yuj. Mayal yacan oc yul k'ab eb ajc'ul yet chi uchlay ay is nail. Xiwilxa aw chi oc bay templo Jehová, axcaxac'al tol c'ual k'in.
- 8 A Jehová max nabalnej el yuchon ay murallail conob Sión. Max cam wal naon tzet ok yun yuchon lajwok, c'amc'al xewilal max yunej, masantac'al max yi ba yuj. Junnejxac'al max yun yayc'ay bulnaj torreal c'al is murallail.

- <sup>9</sup> A jun conob tu', c'amxa is puertail, max k'aj c'apaxtok is yijul ayocok. Max pojtok, toxac'al max aycan wekan sat tx'otx'. A is reyal, c'al eb ayoc yin yajawilal, axac'al xol eb tx'ok conobal max tojcan eb; c'amxa ley Dios bay tu'. Axa eb chekbej Jehová, c'amxa tzet chi ak'i yil eb yuj Cham.
- <sup>10</sup> A eb yicham winakil conob Sión tz'inxac'al xi eb, chotan ay eb bay sat tx'otx'. Chi yajtok eb pokok yiban is jolom, chi yaon oc eb el pichilej. A eb k'opoj ix bay Jerusalén chi ay nojan eb sat tx'otx'.
- <sup>11</sup> Caw wal chi etax el in sat yuj ok'il, caw wal tol ok nic'chaj txam in c'ul chi wabej; c'amxa in tec'anil chi wabej, yet chi wilon lajwi ay eb wet conob, toltax eb unin tol lananto txutxwi, chi camil eb yuj wajil bay yulak calle.
- <sup>12</sup> Chi yal eb unin bay is txutx axca ti': Ak' co pan, ak' co vino, xi eb. Axca wal tol yas chi on eb, cax chi ayc'ay eb bay yulak calleal conob, cax chi bekon ay ba eb yul k'ab is txutx, cax chi el c'ul eb.
- <sup>13</sup> ¿Mac yetok ok ex in lajbaj ex aj Jerusalén? Ex aj conob Sión, ¿tzet junok tx'oxbanilej chin tx'ox ayex, yin ex in mimanc'ulneni? Caw wal miman max yun e lajwi ayok, ¿Macto wal ok ex ak'on watx'jok ajok?
- <sup>14</sup> A tzet max yal eb chekbej ayex, lek'tialc'al elok. Maj tx'oxlay el e mul yuj eb, xan maj q'uexchaj e nabal. Max al-lay el lek'tial k'anej ayex, max e yaon oc jun tu' yin e c'ul.
- <sup>15</sup> A yet chi il-lay Jerusalén yuj eb chi ec' yul be, toxac'al chi tzak' eb k'ab, yin buchwaji. Chi uxli eb, c'al yak'on bil eb jolom yin buchwaji, cax chi yalon eb axca ti': ¿A mi conob ti' chi binaj bay sat tx'otx' ti' tol manxa watx'ilok yili? xi eb, chi buchwaj eb.
- <sup>16</sup> Masanilxac'al eb ajc'ul chi alon yobal k'anej yin. Tol wal chi uxli eb, tx'umumixac'al chi yut eb ti', chi yalon eb axca ti': Mayal jak' lajwok ay yin junelnej. A ton wal jun c'ual ti' max jochej, xan a tinani' lanan wal jiloni, xi eb.
- <sup>17</sup> Mayal yun tzet yetal nabil yuj Jehová, mayal wal yun is k'anej albil yuj yettaxc'al payxa. Max on yak' lajwok yin c'amxac'al yabenc'ulal. Max el wal yin c'ul yak'on tzewok eb ajc'ul jin, max yion wal aj can yikbej eb ajc'ul tu'.
- <sup>18</sup> Ex aj Sión, k'anej colwal Jehová e yetok. Elokab yal e sat yet c'ualil c'al ak'balil. Manchak e bek e yok'i, c'amokab chex oc wanaj e yok'i.
- <sup>19</sup> Coc'takc'al chex aj wan, cax chi aj e yaw yet ak'balil, yin e k'anon colwal bay Jehová. Ok'anej yin masanil e c'ul satak Cham. Aektok e k'ab bay Cham, k'anej yabenc'ulal Cham yuj eb e yuninal, yujtol a bay txiquinlak calle lanan camay eb yuj wajil.
- <sup>20</sup> Mamin Jehová, nato wali, tok wal ayxa junok caywal tu' chot axca ti'. ¿Tok mi wal moj ay eb txutxex chi chiytok yune' tol lananto txutxwi? ¿Tok mi wal moj chi mak'lay cam eb sacerdote, c'al eb a chekbej bay yul a templo?

- 21 Eb ach'ej c'al eb icham winak, mayal ay latz'an bay yulak calle; eb ach'ej c'al eb k'opojtak ix, max cam eb yuj espada. Yet c'ual aytek yowal a c'ul, max a mak'cam eb yin tol c'amxac'al a yabenc'ulal.
- 22 Mamin Jehová, a yet c'ual yowal a c'ul tzanxac'al bay max etek xiwil yatakilal yin conob Jerusalén, axcaxac'al chi yun jayoc eb anima yet c'ual k'in, tok ayto mactxel max colchaj el yet tu'. A eb max jil ch'ibok, max co cuyu', max mak'lay cam eb yuj eb ajc'ul.

**Yailal, naojbail, c'al yipc'ulalil yin Jehová**

- 3** 1 Ayin ti', miman wal max yun waben yail jun yowal c'ul Dios.
- 2 Max in yuktejtak xol k'ekk'inal bay junelnej k'ekk'olinak. Max in yak' bey bay yulak be yin tol c'am in tzektebal.
- 3 Masanilc'al c'u cac'al ti' quin is mak'on yetok yowal c'ul.
- 4 Max yak' ichambok in mimanil, coc'xac'al max yutcantok in bakil.
- 5 Max quin is makchej yetok yailal c'al etnejc'ulal.
- 6 Max quin yak' ayjok ec' xol k'ekk'inal, axcaxac'al yayji ec' eb camnak yettax payxa.
- 7 Max quin is makchej yin tol c'amxa bay chi ca weli; yetok wal mimek cadena max quin is c'albaj.
- 8 Caxc'al chi el waw yin in k'anon is colwal, c'amxa chi cha yab in tewilal chi wal bay.
- 9 Max makchej el in be yetok ch'en, yuj tu' xan axac'al bay q'uex be chin toji.
- 10 Lajan wal max yut ba Cham ayin, axca wal junok no oso chi c'ubaj el ba, axca wal junok no coj tol t'inan chi oc jucnaj win.
- 11 Max in jutxlay el yuj yul be, coc'xac'al max quin yutcantok cax max in beklaycan yuj.
- 12 Max watx'nej oc is julbal, max in yaon oc satak is julbal tu'.
- 13 A julbal max jultek win, najat wal max tojcan yich bay max lowi.
- 14 Masanilxac'al eb wet animail chi buchwaj eb win; asanxanej ayin chin yak' binaj eb xol is buchwal k'anej.
- 15 Max in ayji wal ec' yin yatakilal yuj; caw wal c'a' tzet max yak' wuq'uej.
- 16 Max pojtok we yet max quin ayc'ay sat tx'otx' yuj; toxac'al max in can telan xol pokok yuj.
- 17 C'amxa in junc'ulal, tokwal naanto el tzalojc'ulal wuj.
- 18 Chi waloni, tol mayal pax wip; a tinani' c'amxa oc Jehová yipok in c'ul.
- 19 A yet chin naontek in cusc'ulal c'al wec' in tx'oklil, caw wal ya' chi wabej.
- 20 A wal yet chin naontek juntzan tu', manxa animaok ay in c'ul chi wabej.
- 21 Palta ay jun tzet yetal chi wochej tol ayc'al ec' yin in nabal, a ton jun tu' chi wochej chi wac'al oc yipok in c'ul.

- 22 A ton wal yuj is camc'ulal Jehová, xan c'am chon lajwi ayok, yujtol  
c'am chi lajwi is yabenc'ulal Cham.
- 23 Caw wal miman yayji ocok, axca tol ac' chi jil yet junjun k'inibalil.
- 24 Yuj tu' xan chi wala' tol in satak wal yayji oc Jehová; yuj tu' xan  
asan Cham ayoc yipok in c'ul.
- 25 Caw wal watx' Jehová yetok eb tol a Cham chi yaoc yipok c'ul, a ton  
eb tol chi bekc'al oc ba yul k'ab.
- 26 Yelxac'al watx' tatol chi jechbanejc'al yin numanil, masantac'al chi  
colwaj Cham jetok.
- 27 Yelxac'al watx' tol chi jaoc co ba yul k'ab Cham, yintaxc'al co yaliḡal.
- 28 Watx' tol chon cancan co tx'oklil c'al yin numanil, yak'ban chi yaoc  
Jehová yailal jiban.
- 29 Yowalil tol chon oc yin ayilal, chon ay nojan bay sat tx'otx', talaj  
chito tx'ox Cham is yabenc'ulal jin.
- 30 Caxc'al chon mak'layi, chon buchlayi, palta co chaokabi.
- 31 C'am chon beklaycan yuj Jehová yin junelnej.
- 32 Caxc'al mi chi ya wal oc co yailal, palta chi cus pax c'ul, yujtol a is  
camc'ulal caw wal miman yayji ocok.
- 33 Yujtol wal yel c'am chi cha c'ul Cham chi yaoc cusc'ulal c'al yailal jin.
- 34 A Jehová c'am chi cha' c'ul tol chi etax eb anima yuj cusc'ulal yul preso,  
35 tol chi ilay el yikbej eb yin bay ay yalon yet, ak'bil yuj Cham Axac'al  
Ocok.
- 36 Man watx'ok chi yil Cham, tatol c'am chi beyc'ulnelay eb anima yin  
tojolal.
- 37 Tokwal ay mactxel chi yal junok k'anej cax chi yunen tzet chi yal  
tu', ta manak Jehová chi aloni.
- 38 Ta chi jayoc watx'ilal ma yailal, a Cham chi el yin c'ul yak'on yunej.
- 39 Tzet xan ok on alxok yuj tzet chon oni yak'ban iquis on. Yelxac'al  
watx' chi cus co c'ul yuj co yobtakil.
- 40 Co beyc'ulnejek wal el sic'libil, tzetbil wal yili co beybal, cax chi  
jaon wal oc co ba yul k'ab Jehová.
- 41 Jaektok co nabal, c'al co txaj bay Dios aj satcan cax chi jaloni:
- 42 Max oc co mul c'al co tenomtakil ayach, maj pax ak' tanil co mul jiban.
- 43 Max jayoc yowal a c'ul jin, max on okteni, max on a c'ayil yin tol  
c'amxac'al a yabenc'ulalil.
- 44 Max a c'ubaj el a ba xol jun asun, yet watx' c'amxa chab co tewilal.
- 45 Axca k'alem max con ot satak masanil anima.
- 46 Masanilxac'al eb jajc'ul, max jak eb ti' con buchoni.
- 47 A xiwc'ulal, c'al tx'an yal, c'aybanilal, c'al uchlejebail max jayoc  
jiban, con chiokabi.
- 48 Caw wal chi el jililok yal in sat yuj cusc'ulal, yujtol lanan lajwi ay eb  
wet conob.

- 49 C'am chin bek wok'i, yuj wabenc'al yail,  
 50 masantac'al ok yal con yilon aytek Jehová bay satcan.  
 51 Caw wal ya'xac'al in sat chi wabej yetok wanimail, yuj tzet chi  
 ec'tok yiban eb ix ix bay yul in conobal.  
 52 C'am wal jabok tzet yujal, xan max quin is yukten eb ajc'ul  
 axcaxac'al chi yun jukten junok no tz'iquin.  
 53 Iquis in wali max in k'okon aytok eb bay yul jun olan, cax max makchen  
 can eb jun olan tu' yetok junok ch'en, c'amxa bay chi ca weli.  
 54 Max in aycantok laan xol aej, max in na' wali tol ok in c'ayxac'al elok.  
 55 Mamin Jehová, max in awji ayach tac'al bay najatil yich jun olan tu'.  
 56 Ab yoc yul in nuk'; manchak a bek a chaon ab in tewilal, quin chi.  
 57 Max cach jayoc in c'atan yet jun c'ual yet max ach wawteni, cax  
 max alon ayin: C'am chach xiwi, cachi.  
 58 Mamin, max in a colcan el yul k'ab camich.  
 59 Mamin Jehová, ila wal chin utlay yin man tojolalok ti'. Ach ti'  
 beyc'ulnej in el yin tojolal.  
 60 Ilab wal yili is yochwan eb, c'al naon eb yin tzet ok in yutej.  
 61 Ab wal xin Mamin Jehová, jantak wal yayji oc tzet chi yal eb win,  
 c'al masanil jantak tzet chi na eb win.  
 62 Ilab c'apax is k'anej eb ajc'ul tu' chi yala'. Junjunc'al bek chi yalon  
 eb yobal k'anej win.  
 63 Ila wali, c'ualil c'al ak'balil chin is buch eb.  
 64 Mamin Jehová, paktzej bay eb axca wal is mojalil yuj tzet chi yun eb.  
 65 Ak' pitbok el is nabal eb, cax chaontok catab yiban eb.  
 66 Mamin, uktej eb yetok yowal a c'ul. C'ayokab aj eb oj bay yulyibank'inal ti'.

#### A tzetbil max yun cancan Jerusalén

- 4** <sup>1</sup>Mayal wal k'ekbi el yili ch'en oro. Mayal wal etax el yili is  
 jopopial ch'en oro caw wal watx'. A masanil ch'en ch'en yet templo,  
 sakleminakxac'al max yuncantok bay yulak calle.  
<sup>2</sup>A eb ach'ej bay conob Sión, yelxac'al ochebil eb yintak ch'en oro  
 watx'; axa tinani' xin, lajanxac'al chi utlay eb axca junok tx'otx'  
 xij watx'nebil yuj junok comon tz'aklom.  
<sup>3</sup>Toltax no txutx ok chi yak' txutxwok no yune', a pax eb ix wet conob  
 ti', junelnej wal tol c'amxa yabenc'ulal eb axca no avestruz chi ec'  
 bay tz'inan tx'otx'.  
<sup>4</sup>A eb unin lananto txutxwi, caw wal chi cam eb yuj takintial,  
 toxac'al chi occan lotzan yak' eb yul is jom. Chi k'an eb unin tu' is  
 lobej, tokwal ay mac chi ak'on bay eb.  
<sup>5</sup>Ay wal eb xiwil tzet chi lo yet payxa, axa tinani', lanan cam eb  
 yuj wajil bay yulak calle. Axa mactxel max ch'ib bay yulak na  
 ayxamay yili, axa tinani' a tu' chi cajay ec' eb bay xolak k'alem.

- 6 A wal yailal max jayoc yiban in conob yuj is yobtakilal, yelxac'al ec'ban yintak yet eb aj conob Sodoma. A jun conob tu', yin junnej bek max yun lajwi ayok, tok ay mactxel max oc oyan yin yin yak'on owal.
- 7 A eb yajaw co xol, jopopixac'al yili eb yintak ch'en sakbacom, yelxac'al sak yili eb yintak leche; yelxac'al cak yili is mimanil eb yintak ch'en coral; yelxac'al watx' yili eb yintak ch'en zafiro.
- 8 Axa tinani', yelxac'al k'ek yili eb yintak ak'balil. A mac chi ilon eb bay yulak calle, c'amxa chi nachaj elok mactxel eb. Mayal oc lotzan tz'umal eb yin is bakil, takinxac'al eb axca te si'.
- 9 Yelxac'al watx' yet mactxel max cam yin owal yintak mactxel tol a yuj wajil chi cami, yinxac'al c'o'janc'ulal chi yun cam eb yujtol c'amxa tzet chi lo eb.
- 10 A wal eb xal ix watx' is nabal, chi yak' cam eb xal yune', cax chi txicon eb, chi chion aytok eb yune' tu' yuj yailal max jayoc yiban in conob.
- 11 Max yun wal axca jantak yowal c'ul Jehová, max bek ay Cham yowal c'ul tu'; max yaon oc k'ak'al conob Sión, masantac'al max yal lajwi ay is cimiental.
- 12 A eb rey bay yulyibank'inal, c'al eb conob, maj na eb tatol ay eb ajc'ul ok je' wal yoctok yul conob Jerusalén,
- 13 axca max uj tu' yuj is mul eb chekbej Dios, c'al yuj mul eb sacerdote, tol max pulcantok chiq'uul anima c'am is mul yuj eb.
- 14 Axa tinani', lajanxac'al yec'jab eb bay yulak calleal conob, axca yec'jab eb tol c'amc'alta' chi ilwi; caw wal tz'iltakxac'al pichil eb yuj chic', tok ayto mactxel chi cha c'ul chi oc lacan yin pichil eb.
- 15 Manchak ex jayoc co c'atan, yujtol caw wal tz'iltak ex; manchak ex oc lacan jin, xi eb yet conob eb bay. Chi ec'jabtok eb xolak conob, tok ay mac chi chaon eb.
- 16 Yetok yowal c'ul Jehová max yuchon saklemtok eb, majxac'al taynelay eb yuj. C'amxac'al yelapnok eb sacerdote yul sat Cham, tamwal ayto yabenc'ulal Cham yin eb icham winak.
- 17 Nabaxac'al max on c'unbitok co makwaji, talaj ay mac max jayoc con is coloni. Atac'al bay co torre ayon ajtok co makon jun nación t'inan con is coloni, palta maj pax je' yuj.
- 18 Ayxac'al oc sat eb ajc'ul jin, yin tzet chi yun co beyc'altok. C'am chi je' jeltok bay yulak calle; mayal jayoc lajubal jiban, mayal jayoc camich jiban.
- 19 A mactxel chon ukteni, yelxac'al jalan bey eb yintak no tx'ac'ba'j chi ec' jenenok bay satcan. Tzakanc'al eb jintak bay jolomlak witz; chon maklay yuj eb bay tz'inan tx'otx'.
- 20 A co reyal ayoc yipok co c'ul, cham sic'bil el yuj Jehová, mayal michchaj yuj eb. Ayon ti', max co na' tol a wal cham ok on colon bay juntzanxa nación.
- 21 Ex aj Edom, tol che yak' yajawilal bay masanil is makbej Uz, tzewanek, tzalojanek, yak'ban chi to je'. Yujtol ok apnok c'apax oc yailal e yiban; axcaxac'al uq'uem an ok e yunej, q'uixwiltakxac'al ok e yut e ba.

22 Mayal wal yun jantak yayji oc e yailal, ex aj conob Sión. Man ok ex alayc'al tok yin presoal yuj Jehová yin junelnej. Axa ex ayex ti' ex aj Edom, yuj e yobtakilal, xan ok yak' c'apax Jehová yailal e yiban, caywal tu' ok yun txecloj eltek, jantak wal yayji oc e mul.

**Txaj yuj k'anoj yabenc'ulal Jehová**

- 5** <sup>1</sup> Natek Mamin Jehová jantak wal tzet yetal mayal ec'tok jiban on; ilawal chi yun jetax on.
- <sup>2</sup> A co satak, axac'al yul k'ab eb tx'ok conobal ayic'ok; axa jatut, yet-xa eb tx'ok animail yayji ocok.
- <sup>3</sup> Meba' unin onxac'al, c'amxa co mam on, axa eb co txutx on, mayal can eb tx'oklil, cax c'amxa yichamil eb.
- <sup>4</sup> A a' aej chi juc' on, tolxac'al chi co man a', axa co si' on, tolxac'al chi co tojlanej.
- <sup>5</sup> Ayc'al oc eb ajc'ul jin con yukten ec'ok; caw wal chon c'unbi, palta c'amxa chi yal c'ul eb chon xewi.
- <sup>6</sup> Max toj batxan co k'ab bay eb aj Egipto c'al bay eb aj Asiria, yuj co chaon ch'an jabok co lobej.
- <sup>7</sup> A eb jichmam on max oc is mul, palta mayal cam eb, axa jiban on chi titcan yailal yuj is mul eb tu'.
- <sup>8</sup> A tinani' ayon oc yul k'ab eb mosejal yayji, c'amxa mactxel chon colon el yul k'ab eb.
- <sup>9</sup> A jabok co lobej, puralxac'al chi ji', yujtol ay is may yuj eb ak'om owal bay tz'inan tx'otx'.
- <sup>10</sup> Mayal k'ekbi el co tz'umal, yuj chi tit k'ak' jin yuj wajil.
- <sup>11</sup> A bay Sión, c'al bay conoblak Judá, caw wal chi etnelay eb ix ix yetok eb ix k'opojtak ix.
- <sup>12</sup> Max aj locan eb co yajawil yuj eb ajc'ul oc jin, cax c'amxa jabok yelapnok eb cham icham winak yul sat eb.
- <sup>13</sup> A eb winak tol caw wal tec'an waayi, chi alay oc eb yin ak'oj coj harina; axa eb nak ach'ej chi telc'ojtok eb nak yalan si'.
- <sup>14</sup> C'amxa eb icham winak ayic' bay puertail-lak conob yin beyc'ulnewi. C'amxa eb ach'ej chi oc nuk' bitni.
- <sup>15</sup> C'amxa co tzalojc'ulal. A co canal yin tzalojc'ulal, cusc'ulalxa max yutcan aj ba.
- <sup>16</sup> Tok ayto co corona ayajok; ok'bal on c'ul, yuj max jaoc co mul.
- <sup>17</sup> Yuj tu' xan caw wal ya' on ay chi jabej, lananxa c'apax k'ektanil chi jila'.
- <sup>18</sup> A bay tzalan Sión, mayal uchchaj ay nalak; axac'al bay tu' chi ayji ec' no wax.
- <sup>19</sup> A pax ach ti' ach Jehová, Yajaw achc'al; ayc'al ec' ekbej yin tojbalk'inal.
- <sup>20</sup> ¿Tzet yuj xan chon tojcan c'ayc'ulal oj yin junelnej? ¿Tzet yuj xan caw wal najatilxa on a bekoncanok?

<sup>21</sup> Mamin Jehová, ion meltzoy ayach junelxa, axa co meltzoy tu'.

Matawal watx' chi yun yec' junelxa juj, axca jayji yet yalantok.

<sup>22</sup> Akxa tinani' max on entaknejcan el yin junelnej. Yelxac'al max tit yowal a c'ul jin on Mamin Jehová.